

Flumina. Prope Xeping civitatem lacus est Ylung, cujus circuitus centum quinquaginta stadia superat, in eo tres parvæ jacent insulæ. Est & alter lacus prope civitatem Tunghai ejusdem nominis, octoginta quadrata habet stadia, ejus origo prope Hosi est.

Quarta Urbs

Ç U H I U N G.

Umbilicum Provinciæ tenet hæc urbs, cujus territorium quaqua versum pulcherrimi ambiunt montes, amœnæque fluvii scindunt ac rigant, illudque velut munitissimo vallo cingunt, & ab hostibus tutantur: ubique seges luxuriat, nec desunt lætissima pecori pascua, ærque salubris prorsus ac temperatus; lapidem lazulum, atque optimum colorem viridem fert: fuit olim regni Cu, mox sub Hana familia Yecheu, Cynus rex vocavit Gancheu, Tanga familia Gueicu, Taiminga hodiernum indidit nomen. regit urbs civitates septem: 1 Çuhiung, 2 Quangtung, 3 Tingyuen, 4 Tingpien, 5 Okia, 6 Nangan, 7 Chinan.

*Arclada
M. P. V.
neti.*

Ait auctor Sinicus, ad Borealem hujus territorii partem fuisse olim, ante Tartarorum Juenæ familiæ adventum, regnum & gentem quandam, Kinchi dictam, quæ voces aureos dentes significant, atque ita vocatam, quod tenuissimis lamellis aureis septum dentium munire soleret, forte hæc illa M. Pauli Arclada Provincia est, sed de his infra paulo erit agendum copiosius. Illud hic omnino rarum, quod olim imo etiamnum hæc gens facitare consuevit: prope Nangan nimirum civitatem, lapidem quendam ingentem auro quotannis totum obtegunt, eumque venerantur, ac superstitione adorant; est autem lapis supra decem perticas altus, diciturque Xinxe, quod spiritualem lapidem significat; jam inde à regum Mung temporibus hæc superstitio tenuit.

Montes.

Ad urbis occidentalem partem Minfung mons est, & Viki. ex hoc plusquam centum rivuli scaturiunt, unde totus virefcit, ac fertilibus campis amœnus est.

Kieupuon mons altus, atque profundissimo quasi specu recedens, ad Quantung. Circa Nangan mons est Piaolo, in quo nobilissima argenti fodina est.

Quinta Urbs

C H I N K I A N G.

Fuit olim hic terræ tractus Sinany regni, regum tempore Tien regio dicebatur. Hana familia prima hujus urbis fundamenta jecit, Yniuen civitate exstructa; Suius Quencheu dixit, Mung reges Hoyang, hodiernum nomen Juena dedit familia. quinque illi parent civitates: 1 Chinkiang, 2 Kiangchuen, 3 Sinhing, 4 Yangchung, 5 Lunan. Non adeo magnum quidem, sed lacubus fluminibusque amœnum terrarum tractum obtinet hæc urbs. ipsa magna satis ac conspicua, rebus quidem aliis fere omnibus, at præcipue piscium copia celebris est: ex iis quoddam piscium genus est, ex quo medici contra quamcumque scabiem præsens remedium eliciunt. rapetes etiam optimos incolæ contexunt ex Bylso ac Gossipio: ad urbis Borealem partem ad hæc usque tempora ingens conspicitur lapis, ubi Mung Rex Sinulo alterius Regis legatos excipiens, cum illi minime satisfacerent, extracto gladio lapidem ita percussit, ut ictus ad tres cubitos penetraret, verbis insuper minacibus legatos alloquens: ite & regi vestro renuntiate, quales apud me gladii sint. hoc autem accidit sub Hiaouuo Hanæ familiæ auctore, qui Mung regnum potentissimum, quod etiam Nanchao dicebatur à Sinis, Sinico imperio adjecit.

*Piscis
contra
scabiem
utilis.*

Yokeu mons ad urbis Notolybicum in ripa lacus Vusien, sylvosus est, uno constans vertice.

Montes.

Kinlien mons ad ortum urbis est, inter montium coronam situs, sole oriente totus aureus videtur.

Kiangchuen montem si habet ingentem, ex quo multi rivuli manant. Puonquen mons circa Kiangchuen saxis horridus, ac cavernis pluribus interruptus, inter incultos lapides coenobium ac idolorum fanum exædificatum est sacrificulis frequens.

De fluminibus vix quidquam est præter ea, quæ ostendunt mappæ. Ad Austrum autem urbis lacus est magnus Fusien, centies mille jugera occupat.

Flumina.

Est & Ming lacus ad yangchung, in quo optimi ac præclarissimi sunt pisces, unum genus est coloris nigricantis, Cing Sinæ vocant, hunc piscem multis morbis prodesse scribunt.

Sexta